



UPA 2017/24  
Nuuk 23.04.2017.  
Peter Olsen

### **Uunga siunnersuut: Sullivimmi avatangiisit pillugit Inatsisartut inatsisaat nr. xx, xx. xxx 2017-imeersoq.**

(Inuussutissarsiornermut, Suliffeqarnermut, Niuernermut, Nukissiuuteqarnermut Nunanullu allanut Naalakkersuisoq)

Oqaluuserisassamut qulaani pineqartumut qujalluta matumuuna Inuit Ataqatigiinniit oqaluuserisassaq imatut oqaaseqarfigissavarput.

Naalakkersuisut sullivimmi avatangiisit pillugit Inatsisartut inatsisissaannik nutaamik siunnersuuteqarput. Taamatut siunnersuuteqarnerminni tunngavilersuutigaaat ippassaaninnguakkunni tallimangormat oqaluuserisimasatta ilaat, tassalu; Imm. 25: Sullivinni avatangiisinut suliassa qarfiup ilaata, nunami sullivinni avatangiisinut tunngasup, Namminersorlutik Oqartussanit tiguneqarnissaanik Inatsisartut aaliangigassaattut siunnersuut.

Taamaattumik isumaqarpunga tulluurtuussasoq inissaminiissasorlu tassunga tunngatillugu Mimi Karlsenip uagut sinnerluta tallimangormat imm. 25 pillugu oqaaseqaatigisimasaata ilaanik issualaarlunga oqaaseqaatissara aallartikkukku, Mimi Karlsenip torrallalluinnaqqissaarlugu oqaaseqaatini ilaatigut ima oqaasertalerpaa:

*"Nuna manna sulinermik inuutissarsiuteqarnermik nappateqarpoq. Aalisartuugaanni ilinniartitsisuugaanni meeqqerisuugaanniluunniit, sulinitsigut ilaqttagut nunarpullu napatipparput.*

*Inuiaat napatitsisui inuit isumannaatsumi suliffeqaqqullugit sullissivinnik avatangiiseqarnissaq qitiutinneqartariaqarpoq.*

*Nunatut namminiilivinniartutut akisussaaffinnik tiguserunissaq pissusissamisoorpoq. Maannakkullu sullivinni avatangiisinut suliassa qarfiup ilaata Namminersorlutik Oqartussanit tiguneqarnissaanik siunnersuut akisussaaffimmik tiguserunertut isigaarput."*

Tamaattumik sullivinni avatangiisit pillugit inatsisartut inatsisissaannik nutaamik nunatsinnullu tulluarsakkamik naleqqussakkamillu, nunatsinni pilersitsisoqassappat Inuit Ataqatigiinniit tulluurtutut pissusissamisoortutullu isigaarput.

Piffissaq manna iluatsillugu inuusuttuaqqanut 18-it inorlugit ukiulinnut kilisaatinik usingiaaqqusaajunnaarsimasunut tunngatillugu Naalakkersuisunut apeqquteqalaarusuppugut, tassa naluneqanngitsutut inuusuttuaqqat 18-it inorlugit ukiullit kilisaatini usingiaaqqusaajunnaarnikuupput.

Tassa imaappoq; ullumikkut atuartut aasaanerani usingiaasutut suleqqusaajunnaarnikuupput, aasaanerani aningaasanik katersisinnaajunnaarnikuupput aammalu tamatta nalugunanngilarput, inuusuttorsuanngulerluni nukersorluni sulilluni qanoq nuannertartigisoq, soqutiginartartigisoq, peqqinnartigisartorlu, sulisartunngornissamut aamma sungiusaataallunilu ilinniutaasartoq tamatta nalunnginnatsigu. Tamaattumik tupinnanngitsumik angajoqqaarpassuarnit inuusuttorpassuarnillu 18-it inorlugit ukiulinnik usingiaasutut suleqqusiunnaarneq naammagineqarsimannegeqaaq.

Taamaattumik Naalakkersuisunut apeqqutiginiarparput una; tassa taava imaappa inatsimmi uani nutaami inuusuttuaqqat 18-it inorlugit ukiullit kilisaatini usingiaasutut sulilersinnaalissasut? Inatsissaq nutaaq taama isumaqarnerpa? Imaluunniit qanoq paasisariaqarpa?

Tassami inatsissami tassani nutaami inerteqqummillunniit allassimasoqanngimmat.

Taamatut oqaaseqaaseqaateqarluta apeqquteqaateqarlutalu oqaluuserisassaq inuusutissarsiarnermut ataatsimiisitaliamut suliareqqitassanngorlugu ingerlateqqipparput.

Qujanaq